

621.3443
078
12

光州志

光州志卷之九

光州直隸州知州楊修田總纂

仕賢列傳

國朝

陳 棐

陳棐字孝求光州人少孤依母氏性至孝明天啟丁卯舉於鄉屢試南宮不第又值流寇狂獷遂奉母避地江南尋值國朝定鼎簡擇賢良卽授棐秦興令是時遽呼連響嬰城相望棐以爲賊亦良家子因善撫之但殲其渠魁餘弗問賴全活者以萬數丙戌分校鄉闈得士八連翩去

者六人一時稱盛考績擢御史出巡三楚風節凜然已又改巡順天順天爲畿輔重地訟獄滋甚每慮囚多所平反又疏薦薊州李孔昭祇節礪行容城孫奇逢積學深思乙未告歸養母其冬以他事被逮闔郡憂危棊自信無愧泰然就道已而蒙

恩鑒原仍補御史掌江南道旋以母憂歸服闋赴職卽疏陳臣備員言官以刷卷爲職凡在京各衙門用人行政刑名錢穀卽治天下之大端載在文卷班班可考也但文卷憑各衙門自送外此臣等雖欲觀之無從況天下至廣若無簿籍可查弊卽伏焉如一錢糧也州縣有納糧赤厯上用印

鈐申報上司其弊有限而無印之輪單解費添搭雜派其害無窮卽賦役全書較若畫一猶恐私有加派況今全書未成乎正賦定而後私派可禁也如一刑名也凡有成案者皆易清理至於大獄沉滯每省不啻數百餘命一日不奏讞則情罪一日不定然逐件具題勢所不能宜速復京詳舊制三法司得以彙詳議覆則法簡而刑書不刊矣如一河工也河庫銀糧銷算有冊而州縣之起夫輸柳無歲額實數祈

敕部飭管河道從實造冊總河報部雖無銀可開銷卽

皇上猶得聞小民艱難如一銓法也吏部執品級考今奉

旨人才分上中下地方亦分上中下若無成書奉行未久

恐復溷淆請

敕吏部參酌舊典合以

新旨定爲一書以垂永久疏上多蒙採擇未幾赴山左勘荒秉
公無猜人人畏悅開墾倍數時沂濟數郡亢旱棐步登秦

山祈禱

世祖嘉之特陞兵部督捕侍郎督捕法最嚴匿一罪人連坐左
右隣及十甲長桁楊相望死者無慮數千人棐受命惻然
爲之購地造屋以居無罪者審明卽釋有罪者飼之饘粥
治之藥石屬吏轉相勸輸獄囚遂無殃死者康熙甲辰考

滿一等特

賜表裏羊酒誥封三代蔭一子入監讀書戊申引年致仕至甲

寅五月以疾卒年七十有三

節舊志

胡延年

胡延年字蒼恒光州人順治乙酉以歲貢授金壇令時有
寇亂丞已死於難延年未抵任先馳赴郡以大帥劉良佐
兵至出奇計破之城賴以存其餘孽有逸去者不數日復
集延年又擊敗之其危乃安邑人常謂其以少擊眾雖漢
虞詡無以過非虛語也在治勤撫字綏流亡尤加意造士
獎拔人才如蔣虎臣超張譽並願皆出其門以卓異陞工

部主事歷郎中出知保定時有郡豪挾勢橫行大爲民毒
延年申請

上聞竟就誅於郡民大歡慶陞陝西洮岷副使廉得洮岷黠
卒每與蒙古勾結掠民索贖遲則賣之邊外展轉無踪旣
抵任督守將嚴查有犯者卽立斃之此害遂絕蒞事旣一
載請致仕歸東郊置別墅號緝園讀書其中詩文外無他
營爲會經畧洪公承疇師出黔中檄偕往且許以節或時
延年已病遂力辭

節舊志

唐 瑾

唐瑾字雪靈光州人少以孝友稱嗜古力學順治丙戌成

進士授嘉定令邑賦役繁重兵荒後尤難催比瑾力向上
官陳其凋敝始得奏請如萬厯初額民釋重累又故紳家
有重獄遭籍沒瑾哀其兩女無辜爲出重金贖之好獎士
類如沈繹堂荃毛聖羽贊皆所特拔後以丁內艱起知青
浦民瘠賦繁姦胥爲蠹瑾悉心釐剔積弊遂除轉新城令
丁酉分校鄉試以字誤被逮旣昭雪遂堅請致仕

節舊志

方濟奎

方濟奎字若水光州人幼孤從兄學順治戊戌登第授廣
西貴縣令邑瘴厲鄉狼獾雜處荒殘多逋賦奎旣任事乃
招流亡給牛種民有不能完正課者爲申請蠲除自是三

年內開墾數百頃奏銷竟得如額又勸學作士邑數百年未舉一科至康熙癸卯鄉試遂有獲雋者甲辰邑荒旱土官乘隙拖騙折米銀萬餘兩撫憲以反叛具題尋遣將弁來勦奎力爭之不得乃躬詣土官曲陳利害得完銀三千兩餘逋銀設法賠補并力請蠲除逋額遂完土人多蒙全活乃共建生祠祝之名曰威惠方公云

節舊志

胡虞胄

胡虞胄字又元光山人順治己亥進士任吉安府推官秉正嫉邪苞苴不入每於奏當之牘必宛轉以求其生若無計可出者輒停筆不忍下吉民故溺女申請嚴禁復給貧

者以乳哺資全活甚眾又性介上官委董漕務盡草收兌起運諸費督撫交章薦之力以年老請歸

節舊志

闕碧霞

闕碧霞字景曙光州人順治戊戌會魁授甯都令忠信仁恕民甚戴之性恬適不汲汲富貴越二載卽退休林泉煙霞之興時露詩歌繪事中寸箋尺楮得者寶若球琳蓋王維米芾之流亞也

節舊志

鄭欽陞

鄭欽陞字敬齋息縣人順治壬辰進士授惠州府推官持法廉平人皆允服郡白雲碧甲山毗連三省積盜盤踞其

中屢勦不服欽陞至曉以恩義卽釋戈歸農又博羅四境
去縣治窺遠民多逋賦欽陞進父老諭之不閱月積欠全
完懲惡弁劾貪令雖上官庇之不畏時有鉄面之稱陞刑
部主事以病卒於道惠人爲之罷市

節舊志

熊 綸

熊綸字子布光山人康熙丁未進士授邯鄲令遷知沔陽
州皆以強幹任事豪猾斂迹

存舊志

周士二

周士二字孚先光山人順治間以鄉薦除建昌推官仁明
廉靜郡人歌之康熙癸卯爲鄉試同考因以硃卷題字尖

檢謫貴州龍里衛經歷歷署廣平定番兩州苗人爲立去
思碑遷知延川半載調繁環縣未及赴以積勞邁疾卒於

延

節舊志

劉永吉

劉永吉字峭雪順治間以拔貢授桐鄉令嘗曰邑故漢循
吏所治我不稱職何以相對旣任事政尙寬平務以禮教
邑人懷之如父母師保

節舊志

余新鼎

余新鼎字恒泰光山人康熙初以拔貢知任縣務以德化
民在任七年民習其政以請老未遂卒於官

存舊志

蔡國傑

蔡國傑字子高光山人補博士弟子員好學能文會明季鼎沸王師東下授孟將軍幕府叅軍以軍功授温州府推官決讞詳慎郡無冤民遷揚州司馬管理船政善於其職後以老請歸年八十三而卒

節舊志

胡喬年

胡喬年字天木光州人少年攻苦至病嘔血爲文清致高標不落凡徑康熙丁酉舉於鄉庚辰成進士當獲捷時乘羸而歸里人不知其雅度類如此性尤篤孝父母相繼病數年衣不解帶爲破產求醫以此工青囊術爲里人治病

應手而瘥授福建羅源令清積逋決淹獄招徠山頑草除積弊邑人無不感誦又邑境遼濶遠鄉民納課鬻穀爲艱喬年詳令各鄉設立倉廩准價徵收民尤稱便將趨內召未幾卒遠近惜之

節舊志

賀基昌

賀基昌字彥博光州人幼孤事母以孝聞康熙辛丑成進士令山東昌樂縣明斷無滯獄廳事常虛上官有疑案皆委治之性尤廉介凡陋規悉湔除或謂難爲後繼曰此不過剝民術耳後官倘知自愛寧或以我爲非時上官有不遂所欲而迫之者終不易所守曰貪酷二字無術及我若

免吾官聽之而已後果以盜不全獲降級人謂有例可援
曰尙復何求遂解綬歸去之日囊篋無餘節舊志

許天榮

許天榮字漢昭固始人以博士弟子員起家留心經濟慨
然以奇傑自命順治初經畧洪公承疇督師征黔滇駐節
湘沅天榮以明經從軍自効陳底定之畧十事悉合機宜
經畧奇之遇以國士凡軍中轉輸之任咸以委榮大勳既
奏因得優敘初除貴陽府通判駐劄畢節衛地經殘破之
餘苗民錯處易相煽亂榮抵任爲誅茅闢土葺雉堞建學
宮撫循教化者七年苗民遂皆向治丁外艱去服闋補判

杭州時潘陽范公撫浙吏之貪墨者鋤擊畧盡每與榮語必測景移晷語人曰吾於庶僚中見許倅如孤鶴之翺千仞不可以凡羽儔也甲寅耿藩叛突犯仙霞總制武定李公移鎮衢州榮仍檄司挽運時舳艫千里絡繹如織以一身任之尅期立辦旣而師凱旋前經從逆之鄉其子女盡爲俘獲榮慨然曰脅從罔治

聖朝原有解網之仁况時當離亂能必此嗷嗷者盡非良人乎因亟白諸大僚且首先捐資代贖有留難者告其帥以法繩之藉以還聚者數千百人未幾擢鎮江同知杭人留之不得相與遮道而餞之者數千人

錄前志

周士璿

周士璿字虞赤明侍郎之剛姪順治初以歲貢知慶都邑當孔道兵燹之餘民更貧瘠士璿除雜派減供應困以稍甦轉知宛平稠人雜處法在必行豪猾斂跡尋陞慶陽同知歷南昌太守則政務寬大以滌繁苛蓋隨土宜爲敷布不拘一轍故所至有聲至南郡有五忠祠湮廢已久捐俸再建尤於風化有關云

節舊志

周期生

周期生字觀我明知縣士琦姪順治戊子副榜除知甯晉邑舊有水泊籽粒地居民賠累多致流亡期生力陳其狀

獲免銀三千二百餘兩遷知應州民苦役累流亡亦厭卽
詳除絕戶丁銀八百一十兩復版籍者遂于有餘家又代
州民完逋欠銀五千兩皆鬻私產爲之應民深蒙其惠後
陞刑部員外郎歷本部郎中致仕

節舊志

曹琪

曹琪息縣人好學能文性尤篤孝順治己丑成進士授行
人甫轉禮部主事卽丁母憂歸哀毀骨立相繼而歿人皆

悼其不祿

節舊志

宣紹中

宣紹中字文卿息縣人順治戊子副榜初任廣甯通判以

廉幹著稱轉池州同知歷長沙知府遭吳逆之變抗節不受偽職調知寶慶時軍興旁午紹中奉委給發軍餉日無暇晷因勞致疾致仕歸里

節舊志

陳吾鼎

陳吾鼎字玉鉉息縣人順治間由諸生仕至湖廣分巡荆西道居官持風裁人不敢干以私年未艾卽解組歸怡然以讀書教子爲事不妄交接長吏之庭非公不至優游林下二十餘年

節舊志

任暄猷

任暄猷字美君息縣人幼聰敏讀書數行俱下順治乙未

成進士除永平推官治稱平允尋遷甯都州牧值吳逆倡
亂乘夜來攻城垂破暄猷率眾力戰斬賊首一人自亥及
辰復連勝之賊却城乃復全督撫上其忠勇超擢贛南僉
事時年已六十有九以老乞歸卒

節舊志

楚有才

楚有才字倚相息縣人生而穎異弱冠補弟子員值經畧
洪承疇南征隨軍自効以才幹稱尋授沅陵縣丞遷知武
邑則務操大體不事繁苛士民便之

節舊志

洪應嵩

洪應嵩字稚豫明副使應衡弟順治己丑進士授南宮令

惜民愛士政簡刑清遇荒歲多方賑濟邑無流亡方以循良奏最遽卒於官士民惜之

節舊志

沈一澄

沈一澄字澹永商城人爲諸生時邑都憲楊所修延於家每閱其文必與諸子嘆賞曰澹永未易才當以國士待之登順治壬辰進士任保甯府推官擢刑部員外郎讞獄準情酌理吏不能欺後致政歸獎勵後進老而猶篤凡邑中習舉子業者無不就正其門

節舊志

黃卷

黃卷字奉豫商城人康熙初以明經爲尉氏教諭勤於訓

迪每校課諸生隨其姿稟高下誘之不執一法士來請業者無虛日性尤廉介取與不苟辛亥冬歿於官布袍單被無以爲殮上官憫其狀各出俸以賻送之還里

節舊志

楊名世

楊名世字質白商城人順治戊子舉人除知浮山邑多逋賦前令皆以此罷職名世既抵任寓撫字於催科中人心感悅輸將恐後積逋以清又俗故僻陋諸生多荒本業名世力爲振作士風亦變以異績擢知乾州浮山人感其德不憚走千里稱觴祝之乾當西北衝徭役煩重兼伏莽者時行剽竊名世爲除雜派清保甲嚴禁飲酒賭博萑苻肅

清夜戶不閉有囚因鄰婦罵其母忿激殺之司刑者已擬重辟各世憐其情力為開釋竟得減死由是他邑訟獄咸願質成上官嘉其能已擬首薦忽以疾解組歸里後敦親好廣周郵構書齋於城西課子孫其中年七十八乃卒節舊志

王調

王調字無戾明刑部郎中照孫好學篤行與弟詞俱有文名前辛巳城陷父佺被執調乞賊釋父父叱曰國破家亡父子同死宜也何乞為賊以鉅鎚擊之父子仆地賊去逾時有人呼其名曰汝速起少遲則火至矣調遂甦見父已

死方憑尸哭忽弟訶至昇父淺葬訖賊果縱火則已脫於
難矣順治戊子以選貢入成均康熙辛亥授延平通判持
己以廉臨民以恕被布茹蔬不改寒素數千里寄弟姪輩
僅一筆一墨而已或有謂其過苦者調曰不敢忘先訓故
也以病卒於閩囊無餘物同官助之乃得殮

節舊志

劉 泗

劉泗字光源光州人幼貧嗜學雖儲無儋石而絃誦不輟
順治甲午舉於鄉署陳州學正諸生造謁者諱以行誼文
章相規示轉知鉛山清逋賦除姦猾修圯釐弊作士恤民
有閩中飢民流九邑境一千六百餘口悉令載入編氓詳

光州志 卷之九 三
請給銀米咸得存活課最將遷去忽卒於官邑人立石志

思節舊志

李爲極

李爲極字用之光州人順治初授上元司訓經畧洪承疇嘉其才能委署江甯縣事供給滿漢兵餉檄至立應隨轉知建德邑頻遭兵燹百姓逃亡爲極加意招徠課農桑除派擾流者漸歸時奉檄加糧力以民苦凋敝元氣未復爲辭上官意拂遂辭職去後承疇復辟用之不就

節舊志

羅士

羅士字夢求光州人順治甲午舉於鄉授永城縣教諭時

有重案株及邑紳士甚眾上官已檄縣緝其妻孥繫獄士
哀其無辜力爲申救漸乃昭雪教士以黜浮薄敢行誼爲
主以疾卒於任臨歿時猶手書式好堂三字遺其子櫬還
永士執紼百餘里歌詠志勵有拭將泮水千行淚來答青
瓊十載寒之句

節舊志

胡潛

胡潛字子昭光州人沉潛力學尤善於詩渾脫瀏離力矯
鍾譚諸弊康熙初由明經授原武訓導原之諸生成樂就

啟迪慶得師焉

節舊志

楊士杰

楊士杰字南一光州人氣骨岸異爲文不輕落筆每刻意
搜索語不驚人不休康熙初領歲薦杜門却掃翛然一榻
惟以勤課諸弟姪爲事除新昌丞甫任事海孽竊發檄杰
隨勦躬冒矢石戮力行間事既定循分供職以勤慎稱向
里役日供丞斗米及酒燭杰悉草去值裁俸二年食無所
出但手植園蔬自給敝袍穿履怡然自適邑中陳顥侯呂
柏菴諸賢達引爲性命交後進執經問字願執弟子禮者
武相接蓋君廉隅整飭不隨人俯仰故新人傾倒率在常
格外昔人所謂余不負丞也行就擢乃卒於官遠近無不

悼惜之節舊志

張恪

張恪字心翼光州人刻意勵行從不與聞外事順治庚子以恩貢授平谷令邑時流亡甫集生計爲艱極力撫恤勸課農桑民乃安業性嚴正治豪猾不少假有以暮金嘗恪者懲之以光棍例邑境肅然丁內艱却殯資其所守可知也服闋補知昌邑邑俗故刁悍恪以禮教之兼減徭賦革派擾士民乃漸向化蒞事二載解綬歸家計蕭然猶設館授徒垂二十年

節舊志

王初集

王初集字體仁光州人貌魁梧有幹畧中康熙乙卯舉人

選授江南豐縣令甫下車力整凋敝修學宮息訟甯人務以禮教前令陸以倉麥虧空羈栖於豐集爲補之俾得回籍先是豐文風不振者幾六十年爲設義塾自捐修膳加意激獎後邑諸生連掇巍科人文蔚起署碭山篆力釋疑獄全活甚眾署沛縣亦著有治績後因年老告休三邑士民咸哭送之

節舊志

石拱極

石拱極字天一幼嗜學卓犖不羣康熙庚午舉鄉試第一癸未成進士授靜海令邑近海蘆葦中多蝗子又濱運河冬月糧艘時患凍阻極皆先事預防經理有法適江南劇

邑需員調知蘇州吳江奉檄將行值歲歉念積逋終遺民累遂代完銀二千餘兩抵都於湯泉

召見奏對移時因身受曠典益圖報稱蒞任後減火耗寬徵比力行保甲嚴懲刁健寬猛相濟治化大行丙申歲歉以查辦賑務積勞致疾而歿

節舊志

胡煦

胡煦字滄曉光山人幼貧苦事親以孝稱康熙甲子舉於鄉任安陽縣教諭壬辰始成進士年已五十八歲矣經學淹通尤深於易方八歲始見太極圖而喜之無日不書弼冠以後舉古人解易之書縱觀密覽擇其理解精粹與經

文相發明者手自抄輯垂五十年成書九十九卷名曰函書是年

聖祖於澹寧居引見進士次及煦煦以所著函書奏

聖祖曰爾知周易乎煦對曰聖人之道盡在周易臣學之四十餘年每以易理深奧不能殫究精微但於伏羲先天八卦圓圖似微有體會因本立圖之意爲循環太極圖

聖祖乃舉河洛之數及作易之理反復條問煦一一奏對如出夙構

命翰林臣掖入右班時選館者居右也有間復

召問連山歸藏及楊子之書奏對訖復問六十四卦三百八十

四爻分配一年之三百六十日應去那四卦奏對畧云古人之說有去坎離震兌者有去乾坤離坎者蓋以坎離震兌分主四時故不與分配日月之數然按先天圓圖震離兌俱在東其卦在冬至之後坎獨在西其卦在夏至之後如以六十卦分配一年則多少不均若乾父坤母定位於上下鎮靜無爲故不與六子分配日月今觀上經始於水而終於水火下經始於水而終於水火則六十四卦皆水火之撥換故坎離雖不分配而其用已自行於六十卦之中所以除去乾坤坎離爲當奏訖暗契

聖心天顏有喜

聖祖曰眞苦心讀書人也仕至侍郎故後入祀鄉賢祠曾奉

俞旨著有農田要務十卷葆樸堂詩文集八卷韻玉函書五卷

與周易函書並行云

節舊志

柯喬年

柯喬年字彊齡固始人登康熙癸未進士授檢討轉湖廣道監察御史典試福建道經山左值歲荒百姓皆醵面鳩形丐食於路事竣復

命泣陳其狀由是發帑賑濟賴以存活者數十萬口歷戶兵二科給事中稽察錢局舊有常規約以萬計俱置不取外遷天津道以廉惠著稱時津門遭水災民皆罷黼喬年請帑

賑之又自捐銀三千兩并勸商民出資建立房屋施粥與衣以贍流者內陞鴻臚寺少卿尋歷奉天府丞并提督學政前後數掌文衡所甄拔者皆一時知名之士以病乞歸卒年七十有七

節舊志

陳奏章

陳奏章字抒聞湖廣荊西道吾鼎孫貢生初曙季子康熙壬午舉於鄉雍正四年除知行唐歷調雄縣清苑正定所在皆有聲擢西路同知尋挂於部議改署正定同知又署南路同知乾隆二年冬題知冀州抵任甫七月以疾卒於官奏章爲人伉直篤於友誼與人交不以不肖疑之卽吐

肝膈相示間有負者亦談笑道之毫不爲意然其意氣骯
髒不羣每與之談政事一似左之右之靡所不可而窺其
中又常若有不自得者嘗自敘宮保李公蒞任我見於蘆
溝道左卽論及西山煤窑積弊諄諭除此大害我承命熟
思令所屬把總先搜取簿籍隨率兵親至其處逐各點查
見其衣衫藍縷皆非人形登門頭溝山巔下欄谷中白骨
如莽憐不忍見我出其徒役病者藥之欲歸者資遣之留
役者約法以處之使不致受其凌虐已枯之骨覓取而合
葬之更爲列欸示禁詳請勒石制府嘉獎允行檄宛平令
建碑以垂永久此雍正十一年事也卒年六十有二

徐 獫

徐獫字登子光州人康熙壬子選貢任陳州學正以卓異遷知寶應丁艱服闋起知寶坻性謹慎恬退所在務爲簡靜不事紛張民皆便於其政後擢吏部主事引疾歸怡志林泉足迹不履城市

節續志

楊士瑤

楊士瑤字荆育進士鳳苞次子父歿甫四歲以母命承伯父鳳翔祀性方正不妄言尤篤友愛與兄士恂和怡一庭數十年無少間及兄歿下帷課姪經年不出戶闕康熙丙子領鄉薦第一除知曲陽邑多頑梗瑤以至誠化之習爲

漸移踰年值旱災力請上官計口發賑民賴以安未四載以病乞歸

節續志

石瑤燦

石瑤燦字有徵知縣拱極子幼警敏嗜學甫冠卽隨父之靜海任及量移吳江地廣賦重一切徵發皆其代爲綜理雍正癸卯舉於鄉除知石埭邑故僻處山中民刁頑好訟燦至卽訪其唆者懲之風遂漸息偶陰雨傷禾議者謂偏災可以無報燦必據情上聞其實政類皆如此將一載治聲方日起遽以病歿人皆惜其才堪用世蓋未竟厥施云

節續

志

任相

任相字謙吉固始人恂謹嗜學性尤篤孝初失愛於繼母
父每撻之流血相順受無違出館於張家營離家五里許
每晚必歸省其親妻張氏亦能執婦道承顏怡志歷久不
倦父母轉感而愛之相爲邑夙學教授生徒積金置產與
兩弟均分相中年缺嗣妾連舉三子張氏撫愛不啻已出
里人僉謂以孝子故召此賢婦云中康熙戊戌科進士授
河南府教授到任一月尋以病歸多士慕其德咸依依不

忍置

節續志

祝元仁

祝元仁字資萬固始人曾祖昌官辰沅道死難事具忠義傳中仁生三歲而孤卽解號痛長事母吳孺慕色養雍正丁未成進士除知高安時前令被議漕供稽延符檄雨下仁指畫臂使尅期而辦又案牘山積以獄詞拘者已累月仁日坐堂上耳聽目覽剖決如流積案咸立結大吏才之有疑獄輒以相屬某縣民爭墓地被毆傷微族之黠者與民弟謀藥殺民使其妻重傷致死訐驗令不能決郡屬仁同令再驗知其尸乃毒死令恚甚先訊其同謀者楚毒備至至暈絕固不承仁曰此不能得其情也乃獨退轉至署門謂民妻若弟曰某訛死矣爾輩移時皆死若吐實縱罪

重望

恩赦可活死於刑何爲乎咸卽吐實仁還坐謂令曰得之矣
囚至供承案辭乃定仁明於折獄而意主德化不事刑威
邑有爭水道者經數令不休仁曰吾爲若買此田而公之
若何兩造乃愧伏闔邑感悅至今稱爲祝公田又孝廉某
某者乃親伯姪爭一產屢控不決一日持刺延至廳面數
之曰君等旣爲孝廉何不顧名思義況在諸父猶子間耶
今我何難剖斷顧不欲使是非明白者期爲君等全骨肉
也諭之不可是我德化未孚行將自劾矣兩孝廉流涕請
罪遂爲伯姪如初仁嘗夜訊囚妻於後堂秉燭待之漏四

下仁始退妻問何遲乃爾曰案者盜也黠捕懼比多有拘他盜抵案者三木之下何求不得是以細加究詰其盡心類皆如此蒞任五歲政聲爲江右第一嘗與他令謁撫軍撫軍顧謂他令曰爾輩居官當以祝令爲法出問所以仁曰一錢不要勤慎辦事而已撫軍欲以瑞州守保題會以患腰疽力辭歸之日民走送數百里仁爲人坦白直方遇人有過卽面折不少假故人皆憚其直而諒其誠

錄前志

任 煥

任煥字復旦生平喜讀書尙氣節以國子生轉輸軍餼授

建甯同知尋陞知邵武府蒞任九年吏畏民服有鐵面冰

心之稱九卿考治績爲八閩第一尋陞山東道上官廉其
才凡有所屬無不游刃有餘甫三年勞瘁成疾竟卒於官
邵人士爭祠之所著有樸園稿藏於家

節續志

吳士功

吳士功字惟亮光州人父用烈淇縣訓導有陰德事具善
行列傳中士功未冠以博瞻稱爲文恥詭遇困場屋者二
十年雍正壬子癸丑聯捷選庶吉士乾隆丙辰散館改吏
部累遷至郎中遇事能立堂上與大宰爭是非己未遷湖
廣道御史尋掌京畿道數上章言事有直聲壬戌出爲濟
東道未幾以母喪去官丙寅起爲大名道明年移充沂曹

道賑屬郡饑是年

上幸山左

召見行在

面詢災黎情形奏對稱

旨再截漕米六十萬石以賑卽

命士功董其事周行六十餘州縣無漏無濫民以不饑先是
士功奉

旨調湖南糧儲道巡撫阿公里袞奏留辦賑秋七月事竣歲
且稔有

旨改山東糧儲道尋遷山東鹽運使壬申夏東昌泰安沂州

蝗巡撫鄂公寶委土功督令捕之令不力士功以告鄂公怒欲盡劾罷土功從容解曰劾一令去委一令來中間更代延擱是予蝗以時日滋食民膏耳矧盡劾耶請展限蝗不盡倍其罪許之蝗立盡甲戌陞西安按察司使土功慮秦民憊愚擇科條中易犯者令州縣刊木榜示之俾知所趨避時用兵西陲土功署布政司事飭所過軍馬次於郊毋入城聽百姓具芻糧於軍交易而退軍民晏然丙子調湖北按察司使楚故狡黠多訟遇疑獄輒坐燈下反覆求之必得其情乃就寢某縣有黃某者私人婦婦別有私黃賄人刺所私者死復賄人以應其罪案已定土功疑之覆

訊得實卒正其罪尋奉

命護巡撫印時廣濟民苦私徵士功立縛羣吏至悉置之法
諸官吏聞風皆斂手不敢爲非丁丑秋遷西安布政司使
兼護理巡撫值延榆鄜三郡災議撥寧夏府及綏德米脂
清澗吳堡四州縣米麥充賑以路險賑粟不時達民旦暮
且死士功奏請添雇驢騾輓運復奏毗連州縣勘不成災
者請緩征

上從之是年冬調直隸布政司使戊寅二月再還西安尋於
途中奉

旨巡撫福建仍留署西安巡撫兼管布政司事是年延榆仍

災奏蠲積年逋懸又購騾三千頭供西師凡地不產騾及
產騾而地瘠者令勿與延安府兵糧向兵由府領糧由縣
運奏改就近徵支隴州汧陽額徵屯豆民不支貸歲積紅
朽奏改折色陝多麥少穀奏倉穀用麥抵以從民便秦民
德之九月蒞閩任時臺灣以颶風告壞民田廬殺人畜內
數郡旱種不入土民大饑士功力請發粟緩租貸種食各
事宜行之遂完聚無流亡南洲者閩之盜藪也在江心四
面阻水初薛能太聚黨盤踞經前撫捕斬之黨畧盡有劉
良福者曾事能太太誅福稱盜首仍踞爲巢與副魁游艷
艷等放賊四劫刺人眼灰漆人面沈官兵哨船又有巨盜

林成功亦聚黨數十人託漁戶爲業行劫洋面且及江浙士功至以兵捕之不數月次第就縛誅其魁餘皆待以不死閩盜悉平又臺灣向禁私渡而土地肥美閩粵人往墾其地既立業終不得來迎室家大吏往往奏寬其禁旋停罷士功乃疏其情以

聞畧曰凡渡臺人民禁絕往來不能搬移現在墾地民已踰數十萬其父母妻子皆居內地若棄之而歸則失謀生之路若置父母妻子於不顧又非人情所安故其繫念家人實有不能自己之心以致急不擇音冒險偷渡百弊叢生伏查乾隆十七年原任臺灣縣知縣魯鼎梅纂修臺灣志

云內地窮民在臺者數十萬其父母妻子急欲赴臺就養格於例禁羣賄船戶頂冒水手姓名掛驗婦女則用漁船夜載出口私上大船抵臺復有漁船接載名曰灌水經汛口覺察姦稍照律問遣固刑當其罪而杖逐回籍之民室廬拋棄器物一空矣更有客頭串通習水積匪濕漏船隻收載數百人入艙將艙蓋封釘不使上下乘夜出洋偶值風濤盡入魚腹比到岸恐人知覺遇有沙汕輒趕騙離船名曰放生沙汕斷頭距岸尙遠行至深處陷沒泥淖中名曰種芋或潮漲漂溺名曰餌魚窮民迫於饑寒相率入陷阱言之痛心志言如此臣思愚民之被害姦稍之肆惡魯

鼎梅身蒞臺灣見聞自確抵任以來留心察訪事屬非虛然卒未有因陷溺而告發者緣在人跡罕到之地被害者既已溺於波臣倖免者亦緣自干禁令甯忍其姦莫敢控告臣計自乾隆二十三年十二月至二十四年十月一載之中共盤獲偷渡民人二十五案老幼男婦九百九十九名口內溺斃三十名口其已經盤出者如此其未經發覺者猶不知凡幾伏念內外民人均屬

朝廷赤子向之在外爲匪者悉出隻身無賴若安分良民既已報懇立業有父母妻子之繫戀自必顧惜身家各思保聚此從前督撫諸臣所以疊有給照搬眷之請也及奉准

行以後亦未有滋釁生事者乃因姦民偷渡致令良民在臺者身同羈旅常懷內顧之憂在家者悵望天涯不免向隅之泣以故甦獨無依之人迫欲就養挺而走險畢命洵濤非所以仰體我

皇上如天之覆一視之仁也合無創懇

勅部定議嗣後除內地隻身無業之民及並無嫡屬在臺者仍遵例不許過臺有犯卽行查拏遞回外若在臺有業良民果欲迎其父母妻子及同胞兄弟者許赴臺地該管官報明籍貫及眷屬姓氏年歲册稜原籍覈覆給照搬接其在內地眷屬欲過臺完聚報明該管官移臺核覆申明督

撫給照過臺時驗照放行如人照不符而放行及濫給路
照各當該官司均分別議處其餘偷渡人仍如舊例嚴禁
疏入下部議行自是人得完其室家臺民德之每感激泣
下也士功爲政剛而不殘仁而不弛爲外吏二十年持是
道不變在閩四載被

上脊益厚辛巳以承問提督馬龍圖侵餉事坐失出發往北
路軍營効力明年

恩旨予歸又五年乙酉以老疾卒年六十有七初士功還里
子刑部郎中玉衡檢討玉綸均官京師請歸省不許

上每見其子必問士功年齒衰壯人謂公將復用士功曰

聖恩高厚苟復出必以死報既而自循其鬚髮則又歎曰吾已不堪復用矣卒之夕呼其家人曰語兩兒好爲之以酬君恩以圖父志言訖而逝無一語及家事士功意度豁達喜拯人於厄遇糾紛事一言立解與人相接質直無浮文人
有片長亟稱之意有不可盡言無所隱大司空衛公哲治嘗以詩文見質一字之誤未訂翌日辨之告稍遲若自慙也又常以春温則百物生而晝永爲喻爲人誠篤慷慨用能見知

聖主由詞臣擢至大位

錄前志

吳士恒

吳士恒字健菴巡撫士功兄沉靜嗜學研究經義必洞其
 闕奧州牧延主弋陽書院從遊者多所成就雍正乙卯舉
 於鄉闈二載成進士除知雞澤邑訟者必由吏胥投詞展
 轉旬日令始得判其行否甫蒞任卽立革其弊聽斷明決
 民無冤者他如省株連繫豪強清包攬一切積弊罔不次
 第剔釐不二年治化大行凡他邑諸鉅務大吏並以相屬
 戊辰己巳間征勦金川軍旅往還供應有法里民不擾時
 方倚重遽以疾歿於任子四皆能文長琪司訓開封節續

劉 葉 兄藻

劉葉字次蘭光州人曾祖懋霖任廣東叅政父嗣昌歲貢

藻與兄藻幼承家訓刻志攻苦作文覃思精奧初不爲人所知久乃競相激賞乾隆十五年以歲貢任西平訓導操持清潔嚴於訓迪諸生有不敦品者必斥責之適正齋缺員上官委藻兼攝卽捐俸倡修文廟殿廡一新居四載以老歸日與其兄讌笑爲歡依依如童時藻字綺水性行恬退不競紛華亦由歲貢任尉氏司訓以衝邑倦於迎謁告歸兄弟俱壽至八十乃卒

節續志

涂勉

涂勉字仲勛光州人性慤實讀書字梳句比不徒以涉獵爲能中年始爲詩格律深穩時輩莫及乾隆二十年以歲

貢授延津訓導教人以敦本務實爲主凡所啟迪皆首舉其肯要令人以次體認一時從之遊者率鞭辟入裏不爲

勦襲雷同

節續志

任均

任均字平世息縣人父宣德歲貢生事具善行列傳均生而穎慧性尤篤孝母楊氏患足疾術者鍼之均方四歲在旁涕泣號痛醫惻然不忍措手七歲讀書卽能解大義年旣冠卽以詩文甲其曹康熙乙酉舉於鄉會試不第遂考授內閣撰文中書舍人每人直以敬慎稱未幾祈假歸師事上蔡張仲誠先生訂道學全書及訓子錄又與同郡劉

嗣固叅定四書大全成帙嘗謂士結髮受書當持身正立
品嚴於聖賢言語確有實踐勿徒騁於文辭郡守熊公仲
龍重其望嘗迫見之先是豫省縉紳家鄉民歲輸薪炭米
粟則復其身謂之優免廩員例得十戶孝廉例得二十戶
均曰里有差徭所以辦公今或隸私室有司不得問是豪
右罔法而偏累獨在民也請一切罷之守嘉納自是郡縣
官除公件非給錢不得役里民邑糧冊戶各素多散居四
里中催科用戶頭力難徧周民間一充戶頭輒以賠累破
家均曰按里稽戶居址在某里糧各當歸某里遂罷戶頭
每里各置書手專掌戶糧自此畫一官民便之初母氏疾

不下榻者五年均雖童時未嘗偶去左右後父母相繼歿未及葬適淮漲水匝其屋均伏柩上號涕數晝夜水退屋壁裂不傾人以爲誠孝所感旣免喪當謁補辭疾不起偕弟埏增朝夕講學以訓子孫乾隆庚申時年八十有六因謁祖父墓觸痛成疾尋卒學者無遠近皆臨其窆居恒坐立有常笑言不苟雖盛暑衣冠必整其檢攝身心概如此子五鎮華康熙庚子舉人揀選知縣鎮聲歲貢生鎮驃乾隆癸酉副榜鎮及乾隆己卯舉人揀發貴州以知縣試用

鎮辰增廣生

錄前志

夏俞盛字欽虞息縣人少孤事母至孝珍饻充庾閣務得
歡心後居喪哀痛嘔血瀕危者再夕從兄際盛學一受書
卽能解悟潛心經史作文悉有根柢性尤端嚴言動必準
以禮年六十以歲貢爲輝縣訓導士知其學問篤實競趨
向之後以老辭歸年八十一乃卒俞盛嘗謂爲學當於根
本上著力吾賴兄長提命遂得束脩自立古人云小學是
作人樣子兄每以此示予今雖年耄覺體認不盡也其生
平講學類如此

錄前
志

胡映葵

胡映葵字扶年祖籍沐陽隨父居息縣遂補其邑弟子員

幼端凝嗜學通經史文章宗唐宋大家性篤孝親沒垂三十年追慕之思昕夕罔間雍正己酉以選貢入成均

試異等除知青浦繼調長洲丁父憂歸服闋復補知烏程居官廉潔自好惠愛宜民諸如慎催科清漕弊開水利恤災祲所至悉有惠聲上游深器重之

錄前志

陳友韶

陳友韶字長韓息縣人由諸生考授鴻臚寺序班雍正七年季父奏章知行唐遵例保舉分發四川以知縣試用韶有強幹才時喇嘛自都歸藏差官員護送同事多畏難韶獨毅然請往道出打箭爐越雪山度鉄鎖橋乃抵其處從

役耳鼻皆凍落韶猶督理不懈途次無有貽誤差竣歸復
遣往滇中採辦官銅大吏嘉其勤題署梓潼縣知縣恩威
併用人皆恪守其法獄訟衰息囹圄竟歲無繫囚越二載
以病祈歸乾隆元年病痊赴川委署合江途次疾復作遂
卒於舟時惟長子賡明隨行大吏憫其狀助之乃歸

節前志

洪象旭

洪象旭字載陽息縣人明金吾將軍恩炳五世孫父廷佐
早逝旭篤志力學事孀母以孝聞晚年以歲貢司訓鹿邑
振舉條規加意寒峻鹿士多仰賴焉值歲飢贊邑令查辦
賑務不濫不遺上憲嘉其廉幹凡有公務皆委屬之時議

濟渦黑等河檄象旭督工尅期從事每風雨不避先是胥隸勾通地保賄賣富民專役貧者民以枵腹就役率皆草率完事至是嚴懲猾吏均其力役民皆踴躍赴之功遂稱善未幾因勞致疾力辭告歸踰一年卒鹿人士深悼之謂河成而公卒公雖卒而澤與河水俱長云

錄前志

黃仲庸

劉克翼

黃仲庸字易曠息縣人爲學能自刻厲弱冠文名卽著事二親以孝聞母亡水漿不入口者彌日期年不食鹽菜父歿亦如之同懷弟二人友愛篤至不忍析居鄉里皆式其行雍正乙卯由選貢注銓直隸州判仲庸以祿不逮親甘

志恬退乾隆十五年改授確山教諭首以敦倫飭紀教士
又捐俸鑄兩廡石主司訓某抵任數日祖孫相繼而亡仲
庸資之還里越三載告歸猶以授徒爲事素業春秋晚好
周易嘗手集諸家說分爲上下篇名曰易彙又同邑劉克
翼字建菴性亦篤孝母歿翼方數齧哭泣幾絕瘦如柴立
父諭以守身事親大義慟始少間事繼母竭力奉養如同
所生乾隆二年以歲貢司訓新鄭善於其職士子曾爲勒

石

錄前志

周作哲

周作哲字遠明明太常寺卿汝璣元孫父封臣廩貢積學

力行爲鄉評所推重哲生而穎異甫四歲母汪氏懷抱中授以葩經及通鑑總論輒朗朗成誦比長爲文力追於古不屑屑步時趨家素貧讀書益不輟嘗自言曰吾釜中可十日不炊手不欲一日釋卷也乾隆丙辰舉於鄉丁巳遂成進士除知星子星爲而康附郭邑濱鄱湖每風作波濤山立姦匪出沒其中哲下車爲增置救生船十餘隻厚其賞格集湖中大小漁艇編列字號令互相保結不半載客渡無失事者曾有建議由渚溪開河避湖道以利糧艘者上游信其說將奏行之哲力言其損田廬壞墳墓勞民傷財萬難成功且請委監司勘之果如其言事乃寢上游亦

以是知其老成持重也時都昌縣民有爭草場者每刈草輒持械相爭殺命案累累委哲勘之哲訪得侵佔把持之者皆藩臬兩司中姦胥請而寘諸法復逐一清丈歸之業主積案遂清調知廬陵廬故望繁邑賦會幾十萬水陸交衝留贖塵積哲力爲整頓日摒擋差務夜則秉燭判事訪獲衙蠹訟棍悉按治之四境肅然適鄰邑上猶龍泉二處有小醜謀不軌羽檄交馳遠近皆大恐哲多方鎮撫訛言不作中丞胡公寶琮入其境見民情寧謐獨異他處謂之曰循良二字公眞無忝讀書人爲官不應爾爾耶委署吉安府篆隨擢甯州牧旣去廬士民懷其德以思樂仁侯十

餘章歌之哲至甯見其僻處萬山棚民交錯易爲姦匪逋
逃藪喟然曰此無難治在力行保甲耳爲之紀戶口以釐
居民設店簿以稽過客年餘事果減遂極力振興文教荆
建書院簿書期會而外與諸生講經課藝上游嘉其治行
將以異等薦會因廬陵任內失察賭具呈吏議赴部引

見仍以原職補知賓川州抵任四月復以公罪罷職返里無
所居寄栖他人屋宇親戚過之檢其篋無白金之儲相與
歎其介節云著有醉古軒文集桐陰書屋詩集年六十六
以疾卒子廷琿廩膳生

錄前志

余範光山人性端凝嘖笑不苟學業恪守程朱不爲他說
所惑邑人從之遊者率皆依以成立乾隆二十八年以歲
貢任溫縣訓導在任四年考課諸生一如在家授徒時致
仕歸扃戶獨處問業者猶無虛日

錄前志

王化

王化字道久光州人雍正間任浙江許村場鹽大使值海
漲鹽場盡漂沒竈丁率多流移化爲按甲清查招徠安集
並請蠲其逋賦場利復興公私攸賴分委監築海塘因有
勞疾以老歸年八十三卒

錄前志

祝元程

祝元程字翔萬高安令元仁堂弟幼穎異能文章尤工書法年十四補弟子員辛酉擬元未售遂絕意進取以例貢待銓於選部程父早歿家政皆其主持綜理悉有規法尤篤愛幼弟教之成立又有叔亦少孤門戶不能自持代爲經營俟其壯錙銖計算而付之嘗隨伯兄仁之高安凡事能力勩之仁知其有吏治才促就選乾隆戊寅除知仙居甫下車一邑之事咄嗟力辦尤以惠政及人邑有文明樓建自紫陽朱子代興代廢程捐俸葺之有石橋據要津久圯壞亦出資重修壬午乙酉

上南巡程兩次承辦差務上官無不嘉賞

駕至麻蒙

喪問賜賚甚渥乙酉調知山陰仙居民依依不能舍隣邑臨
海天台等民亦皆以其賢伏道左祖餞山邑多世族程方
正不阿無敢干以私者嘗自言曰上不可負吾

君下不可負吾學前不可玷宗祖後不可累兒孫其服官概
可知矣俗故善訟力懲其唆者獄詞遂日減又遠鄉多盜
賊嚴於訪緝遇竊案必窮治其株柢盜亦斂跡嘗奉檄修
郡城務使堅厚如式上官來勘驗嘆謂浙省第一并飭各
屬均以爲法蒞山陰四載境無螟蝗水旱歲戊子會兩月
不雨徒步爲民祈禱雷雨大作歲仍稔民皆以手加額謂

其誠信格天云以病解組邑人送者如昔之去仙居時歸家未三月病革卒時六十有三程生平見義必爲念梓里貧士無肄業地請諸當道建臨淮書院并捐腴田五十畝以資膏火值歲歉輒爲粥以食貧者或病且死并以藥與樽給之素善醫活人無算遇貧者必與之藥卽重值亦不惜里有兒患痘元氣素虧程以參暗投羣藥中痘乃得瘥其他急人之難類如此及其卒也遠近之人皆思之

錄前志

黃汝震

黃汝震字游雷明陝西廉使忠烈綱元孫父乘邑諸生以應省試感暴疾卒於途時震甫一歲兩兄皆幼穉胞叔某

亦僅弱冠惟賴母周氏撫誨爲人剛方正直孝友天生年
十八補弟子員文譽蒸蒸日上叔輅以選貢赴成均肄業
期滿歸以屆中年尙無子母命以震承嗣乾隆庚午舉於
鄉王申會試簡授修武教諭整飭學宮按期校課生徒舉
古人德行文章一一親爲指授士風翕然丕變學使孫公
灝按臨河陽亟稱賞之值上憲檄修邑志震與邑令悉心
搜羅序次井井視舊志爲加詳焉甲戌會試紆道省父於
家見其羸尪廢步履不忍遠違踰年遂告歸侍養又三年
父歿補除中牟教諭未赴任卒於家

錄前
志

徐宗義

徐宗義字措宜光山人事親篤孝父有不悅則必跪而請
故性嗜學補邑諸生竟日呶唔足未嘗及戶外雍正己酉
由選拔入成均肄業三載除授滎澤縣教諭勤于訓課諸
生有飢寒者則捐俸以助之冬士胥沐其德雖任學官能
留心民事時飛蝗入境同縣尹盡力捕除之不留遺蝻撫
軍雅公知其勤曾以所作捕蝗詩遺之以示獎勵蒞任六
載引年致仕歸里猶手不釋卷下帷授徒著有窗稿詩文
皆能步趨前輩大家

錄前志

馮春暉

馮春暉號旭林光州人世有厚德生而穎悟童時卽以詩

賦擅名年十六補博士弟子員逾年食廩餼時盧南石相
國視學中州甚器重之嘉慶戊午舉於鄉乙丑成進士授
知縣分發山東補濟陽縣時邑無書院春暉捐廉創建後
調掖縣將去百姓攀卧遮留文人獻詩數百首名濟北頌
言任掖縣時歲大飢春暉開常平倉以賑之或曰是當請
於上台委驗確實而後可行春暉曰展轉行查必須一月
一月之中增數千百餓殍矣達官卽罪予不過鑄級以一
人鑄級易數千百生命尙何惜焉遂先賑一時當道頗以
是重之癸未題升臨清直隸州知州接篆未百日有直隸
清河縣教匪馬進忠傳習邪教煽動兩省十二月初七日

由清河適山東館陶縣之辛集劉允中家冊立僞后劉氏
竟披黃袍親率多人張旗幟渡運河河上人無不愕然堡
頭來稟春暉會合都閩夤夜興師圍辛集擒劉允中等十
餘人時馬逆已赴弔馬橋復追之悉擒以歸搜獲經卷神
像旗幟並從逆人犯名單於是以謀逆論中丞入 奏奉

旨賞加四品銜丙戌七月引 見之後復 召見於勤

政殿 天顏溫霽 訓示周詳先是四品以上方有 召

見例春暉以直隸州 召見乃曠典也丁亥升任曹州府

知府己丑補東昌府知府未二年以病告歸先是張船山

守萊州工詩春暉每從之遊性耽吟詠著有椿影集行世

梁 鞏

梁鞏字又曾光州人家貧無力延師不克讀書十三歲時懇請於母陳太夫人前再三求讀書十四歲始詣塾受業舉止類成人誦習不分晝夜十年學成補博士弟子員旋卽食餼教授鄉里十有八年從游者甚眾謂及門曰讀書講學必求腳踏實地豈徒尋章摘句已哉經其指授成就者多嘉慶己卯舉於鄉道光壬午成進士授知縣分發湖南補授澱浦縣南一百二十里有龍潭鎮與猺山犬牙相錯民猺雜處往往出械鬥巨案鞏以爲凡事欲治其流莫若先治其源於是輕騎簡從攜帶民猺互控各案卷往龍

潭鎮居住就近傳齊兩造質訊明白須勘定者親身往勘
兩月有餘數十年未結之案全行完結民徭莫不感戴共
慶生佛戊子科調同考官代理者爲某司馬九月初通稟
大隈溪內有數萬人謀逆拒住溪口請兵勦滅適鞏出闈
上憲急詢其事鞏曰該溪在高山之內履任後曾親往踏
勘兩次查有吃齋念經者均係年老求保身家平安實無
別事上憲卽速飭鞏回任鞏先令人持一簡明告示送至
溪內該處人看是梁縣官告示並見縣主單人匹馬親到
均將器械投地匍匐前來感泣陳懇鞏卽在溪內住宿剴
切曉諭均各出具永不吃齋念經甘結代爲通稟銷案戊

戊升桂陽直隸州己亥年六十餘告歸林下優游者廿餘年卒年八十七著有安定堂文集行餘詩草行世

王文鼎

王文鼎字凝伯光州人道光乙酉科選拔貢生朝考一等第一以知縣用任山西徐溝縣地當孔道治理裕如時值榆次文水太原三縣民因爭水灌田聚眾數千勢甚洶湧中丞飛檄委文鼎往勘地界文鼎單騎馳往費五晝夜之力盡得其情民心悅服案遂結三縣民立碑頌德適丁母憂去官接奉父諱服闋選廣東高明縣知縣卽陞萬州知州復署瓊州同知所厯州縣咸有政聲甲子年卒於瓊

年六十有九入祀萬州名宦祠

李麟書

李麟書字師柔光州人負性剛方持躬廉謹由附貢議叙府經分發廣東補肇慶府經歷官署久廢借廉創修權開建縣事適值大旱麟書步禱於城外之鼎湖山果獲甘霖所有陋規一概裁除聽斷明決案無留牘百姓戴德爲立長生祿位踰七旬致仕歸

葉知幾

子廷杰

葉知幾號望廬原名蔚林光州人生而穎異勝衣就傅循循然有成人風及長篤於孝友力學不倦年十八補博士

弟子員旋食廩餼嘉慶丁卯舉於鄉丁丑大挑二等己卯
署蘭陽縣教諭適值河決之後縣署權移河北惟學署尙
居城內環城哀鴻流離知幾奉委散賑每衝風冒雪乘瓜
皮艇往來驚濤流澌中無懼色道光辛巳選伊陽縣教諭
是縣僻處山中人皆敦本勵學而科目無聞知幾到任後
爲之口講指畫文風蒸蒸日上登賢書捷南宮者遂有五
人咸豐壬子推陞懷慶府教授先是子廷杰乙巳成進士
官吏部在京供職癸丑四月廷杰由京請假携眷至懷省
覲五月粵匪突至圍攻懷城地雷迭發險難備經知幾見
家人淒涼之色泣然泣下謂廷杰曰汝何辜適率妻子於

此雖然命也以子則孝以臣則忠勿悔隨同府縣守城凡五十九日圍解論功奉

旨加光祿寺署正銜是年冬仍飭廷杰入京供職戊午奉

旨派葉廷杰充山東鄉試副考官揭曉所得皆知名士同治甲子知幾推陞翰林院典籍以年老請休共留主講覃懷書院丙寅回里卽主講弋陽書院先後及門科第者二十餘人丁卯重晏鹿鳴

恩榮備至適值廷杰以軍功奉

旨賞戴花翎補缺後以道員選用知幾聞之喜可知也生平嗜學手不釋卷或謂何不尋人間談藉消悶懷答曰吾與今

人談勝與古人談乎著有東婁筆稿醉六堂詩古文若干卷嘗謂利之一字爲人鬼關必須打破此關方許爲人故服官四十餘年華服珍玩一無所有惟先後置書數千卷而已年九十餘無疾而終廷杰服闋後逾年奉

旨簡放雲南曲靖府知府廷杰力疾出京行至南陽舊主講地素被裁成者咸來顧問嘆曰報國心未遂此願付來生遂終焉廷杰號雋齋知幾第三子

吳保泰

吳保泰號南池光州人歧嶷時天性孝友器識遠大應童子試學博某善風鑑謂封公曰此子風度端凝名臣事業

他日可卜道光壬辰舉於鄉庚子成進士授職編修屢司
文柄丙午典山東試實事求是揭曉後士論翕然辛亥典
試湖南差旋又有視學粵東之

命值紅巾賊起保泰按臨潮郡賊阻藍關歸路於是檄近屬及各
鄉練勇奮力攻散粵督服其胆識欲奏保花翎寵榮之保
泰力辭未幾擢國子監祭酒調移福建學政任適南方不
靖閩省軍書旁午各郡蹂躪之餘文廟傾圮保泰案臨裁
減支應勸諭紳衿助修黌宮各屬漸有起色差竣陞見

溫諭移時命稽察左翼覺羅宗學同列嘖嘖羨之而保泰心愈抑
志愈謙常思進忠補過前後章奏進卽焚草雖親戚子弟

未嘗告以宣室樹也旋擢詹事授浙江學政時浙遭兵燹
道路梗塞啣

命直前行李蕭條見者不知爲朝貴撫軍爲左文襄壬辰同年友
也交甚洽全浙恢復文襄欲附其功於疏力謝乃已次年

文宗顯皇帝龍馭上賓保泰念絕無夤緣而受非常知遇痛哭幾
暈絕然仕進之心從茲淡矣未幾丁內艱回籍保泰雅擅
知人山左所得士馬新貽者往謁時甚渾樸一見卽曰子
局量宏遠他日必至方面後果如其言校湖南試卷已備
最後得一卷短章寥寥風骨嶙嶙保泰曰制舉文如是必
鉅手也此人必以名節顯曉後知爲鄒漢勛以經學馳名

宇內後果同江忠烈死難此外文章政績卓卓不可枚舉
內行尤篤事親善體志弟履泰王子舉於鄉任直隸束鹿
縣保泰視學浙江時太夫人年高不欲遠涉險阻留養束
鹿署節省學政廉俸絲毫不私妻子徑呈太夫人嗚呼聞
其風者可以生感矣

張國華

張國華號蔚春光州人幼而勤學游泮後有文各道光壬
辰舉於鄉大挑知縣歷任廣東定安合浦海豐諸縣潔已
愛民咸有政聲其最著者定安撫黎一事黎人之在定安
也與本地鄉民互相爭鬪素有仇怨咸豐初逆匪爲官兵

所敗餘黨遁入黎峒蠱惑黎獠爲亂俾民黎不通者數載
國華抵任之初或謂帶兵勇以示威或謂急攻勦以除患
而國華以安民爲要務德政次第舉行下車數月後慨然
單騎直造黎巢人咸爲懼而黎人一聞官至奔走偕來羅
拜馬前如嬰兒之投父母國華恕其既往與之約法自是
民黎相安非其撫以恩感以德曷能心悅誠服如此哉

張元益

張元益字泉初光州人道光庚子副榜咸豐壬子舉人癸
亥進士官禮部主事素精堪輿冠蓋迎謁者日不暇給同
治二年春隨大學士周祖培相度

普祥
菩薩

峪萬年吉地次年隨

恭親王覆勘先後隨京堂官查勘

惠陵者二次七年冬奉

特旨辦理

惠陵封禁事宜次年六月蕝事

龍顏大喜奉

旨嘉獎補本部儀制司主事十二年三月扈從

穆宗親臨二峪查看形勢卽於山中

召見垂問周詳是年八月隨

醕親王前往該處定爲

萬年吉地掘地得磁瓶二具一畫卦一龍文高皆尺有咫方八寸賞鑒家以爲皆漢以前物邊外荒地而得此眞非常嘉瑞也十月奉

旨張元益着免補員外郎以郎中卽補十三年補本司郎中光緒元年再隨

醇親王布置

穆宗毅皇帝惠陵並襄辦典禮奉

旨俟知府得缺後以道員卽補三年六月

欽放廣西桂林遺缺補思恩府知府三年七月到任其整頓書院編聯保甲清理訟獄諸善政不可殫述四年冬賓州八

卦村民械鬥殺斃二十八命是時元益帶勇二營或謂該村素賊區宜勦滅元益不可紮營賓州境上遙作聲勢而自單騎親往曉以禍福飭令捆送元兇脅從罔治眾欣然當獲首要多人稟請正法州境乂安七年百色土匪滋事勾結舊城匪首陸三遠竄擾上林等縣人心惶惑幾於朝不保夕元益紮營防堵陰遣健卒直搗賊巢生擒陸三遠梟示餘賊逃散百姓安堵如故元益遇事鎮靜不動聲色化險爲夷多類此生平工文善書堪輿而外兼精岐黃以醫藥活人者不可勝數不具論論其在官者

胡成祥字怡園光州人廩貢生入監肄業考授吏目分發山東補濱州吏目微官薄俸藉以養親在任時仍以誘掖後進爲事門牆稱極盛焉以曾孫均 誥贈通奉大夫

胡培荃

胡培荃號晴洲光州人由兵部供事議叙府經歷分發浙江補湖州府經歷以水災放賑有法修築圩堤勞績保知臨海縣事在任不避豪右後調補平湖臨海紳耆請留再四邑人獻攀轅圖二軸詩二卷以誌愛慕焉平湖近海英夷犯順陷乍浦縣城相去僅二十七里培荃誓眾堅守晝夜不懈內獎士卒外請救兵城獲無恙夷退安撫士民收

葬戰亡官弁請免難民錢漕民心大定後升知海甯州事
接篆甫四月病故郡人共歎地方無福云

胡培蕙

胡培蕙號畹溪光州人由內閣供事議叙府經歷分發安
徽補鳳陽府經歷署無爲州州同在無爲州任時值江水
泛溢難民嗷嗷州牧命培蕙專司賑事勤勞備至捐廉助
費民得保全者無算 上憲錄大功數次旋升繁昌縣知
縣到任甫數月丁母艱回籍遂致仕

胡春毓

胡春毓號芳圃光州人由刑部律例館供事議叙府經歷

分發浙江到省署杭州府經歷旋稟請改掣四川到省歷署富順縣自流井縣丞敘州府經歷咸豐元年咨補綏定府經歷卓異候升以知縣用七年軍機處有人保奏四川綏定府經歷胡春毓奇才異能奉

上諭著四川總督調省查看如果係奇才異能卽由該督給咨前赴江南向榮大營聽候差遣如係尋常幹練之員仍留原省遇有要事差委可也總督奏留辦綏定府屬團練寨堡事及至滇匪李永和之亂則人無可擄糧無可掠者團練之效也郡人士咸歌功德而春毓至是已物故矣思感不已乃立廟於郡之後山鳳凰寨以祀之香火極盛焉

左逢泰

左逢泰號宜園光州人曾祖天德人善行傳逢泰誦讀詩書幼有大志咸豐六年州境歲荒遇有賣婦女者輒代爲贖之嗣捐府經分湖北上憲委辦賑務甫設局賑款尙未頒下逢泰先捐叁百餘金施粥飢餓者全活無算至今棗陽門外尙有功德碑同治五年陝甘回匪作亂蒙調營効力保升知縣加同知銜賞花翎卽補公安縣又蒙甘肅辦事大臣調營効用西甯地方番回雜處遇有命盜案件審理番蒙之事語音不諳通事因以作弊逢泰負性聰明人耳輒曉不用通事民隱悉達疑案均結蒙番均呼爲左佛

陀後署西甯縣未三月卽丁艱哀毀過甚積勞病故

李瓊

李瓊字寶山光州人報捐湖南縣丞補善化縣榆樹灣縣丞拿獲貴州大盜龍騰甲一名保升知縣署安仁縣值歲荒米貴禁止外商販運糧價日減百姓感德立碑調補湘陰縣百姓攀轅遮留著有政績稱循吏焉

王嵩齡

王嵩齡字蓉江號鶴樵光州人素嗜學讀書兼之讀律雅善隸法尤喜鄧石如一派年踰三十因家寒襤被游漢上辛苦備嘗旋受知於李紅樵廉訪髮逆陷武昌廉訪誓以

身殉嵩齡不忍去廉訪叱曰予死成名爾死誰知揮令速去遂慟哭再拜而出迨武昌克復廉訪長子鶴人中丞尋得父尸請嵩齡送其眷屬歸里廉訪待妾十餘人倉皇之際同聚一舟自漢至光未嘗交一言時皆以中丞爲知人中丞殉難後嵩齡奔走江上屢瀕於險聞雪琴彭大司馬統江右軍遂往依焉初至軍未知名屢建奇策始重任之委以督辦文案倚之如左右手數年之間由布衣保至道員同治六年十二月引

見奉

旨着發往安徽以道員卽補當其在大司馬軍中也適楊宮保

岳斌奉命總督陝甘商之司馬請與偕司馬弗許宮保遂
奏調焉及抵蘭州宮保所帶皆湘兵而甘省所駐屯兵每
爲湘兵欺壓互相鬥毆嵩齡勸以不宜偏袒湘軍宮保不
能從又因蘭州距江湘萬里轉餉維艱勸令屯田以濟軍
食宮保又不能從嵩齡以叠次建議弗用遂請省親宮保
留之雖堅弗顧也歸途晤左文襄赴陝詰以何故棄楊去
因備陳焉厥後文襄終以屯田成大功而西陲底定其謀
實啟之七年三月至安徽途次聞訃丁父憂回籍守制九
年六月服闋改掣江西候補光緒元年署理鹽法道二年
補斯缺中丞潘公燾以遣散兵勇幾致釀成巨案賴嵩齡

以靜鎮處之始化險爲夷四年七月署廣饒九南道監督
九江關稅務六年二月回任晉省賑捐案內奏保請加按
察使銜又因籌解陝甘協餉請獎加二品銜九年十月奉
旨補授江西按察使十年三月初七日到京蒙

召見二次

陛辭後便道來光展謁松楸小住十餘日日與親族故老相聚
會五月抵省初七日接印旋奉委署理藩司回任後十一
年七月再署藩篆十月二十四日奉

旨補授江蘇布政使十二月十八日奉

旨調補四川布政使十二年正月二十九日奉

旨賞假一月送母回籍後着來見欽此二月初旬奉母羅太夫人板輿自江右啟程五月中旬抵光如限北上七月冒暑抵京蒙

召對二次助以勤奮供職卽於二十七日

陞辭出都詎料八月十三日行抵彰郡沿途染受暑熱雖延醫調治而病勢日見沈綿竟於八月二十一日辰時溘然長逝卒年六十有六彌留時猶握幕友黃君手語以親恩未酬君恩未報爲憾其忠孝出於天性也生平篤於天倫厚於友誼仗義疏財光緒四年江右江水漲發漂沒民居無算城內陸地行舟首先捐俸運米散給災黎賴以存活者

數萬家又捐修豫章溝疏瀹排決不遺餘力至今省垣無
水患創建浙江河東兩會館添助南昌書院土子膏火獎
賞銀兩均載在江西通志姚雲屏牧州時倡修護城泊岸
重修弋陽書院俱遠道給資飲助邦人士迄今猶稱之書
法端勁肖其爲人一時名公鉅卿求書者指不勝屈得其
片紙寶若球琳又夙好名人書畫所藏秦漢碑帖甚夥論
者比之歐陽公集古錄云

黃銘先

黃銘先字西園號新甫商城人性沈摯寡欲少言不喜說
人過與人交不設城府久而能敬年十九膺鄉薦乙未成

進士授職檢討爲給諫正色立朝彈奏不避權貴以奏請查辦山西平定州竇計小子一案恭膺

宣廟溫諭褒嘉壬寅奉

旨簡放湖南岳州府知府調署長沙府以勵風俗訪人才爲首務各屬聞風興起士習冠一時丁憂哀毀在籍養疴近十載咸豐二年奉

旨授四川夔州府知府伏念受

特達之知益矢勤慎盡心職守時值粵匪滋事戎馬往來賢勞盡瘁以宿疾復發請開缺回籍和鄉鄰睦宗族從不干預外事晚年尤好讀近思錄呻吟語等書鑄有芸館應

制學繡窗課兒草等詩稿

徐繼善

徐繼善光山人福建福安縣知縣在任清廉簡易民便其政官聲特著保舉卓異

吳延瑞

吳延瑞固始人字履豐夢岩子早失怙事母孝常中夜焚禱祈增母壽乾隆壬午舉人丙戌進士任戶部主政旋擢郎中掾廉守正時有渾金璞玉之目由京察授潼商道

純廟有誠實之褒抵任後厘關稅葺書院設官渡凡便民著以次修舉河決朝邑上流多淹沒懸金拯救全活甚眾

署廣東臬篆稽聽有疑者輒晝夜反覆求之案無留牘民稱神明以疾告歸值邑中大旱設粥廠施醫藥又墾義田祠田學田俾族之貧乏者食其租生平不置侍妾不履公門布衣疏食晏如也卒後入祀名宦鄉賢

吳邦治

吳邦治固始人又名涌字濟川延瑞長子乾隆丁酉舉人辛丑進士選山西武鄉縣知縣修廣文廟創建書院造永濟橋惠政不可枚舉旋調汾陽代償前令官帑萬金邑東近文湖貳拾餘村地窪苦潦爲之築堰旱則瀦以溉田至今爲利時值旱飢捐廉施粥出倉谷伍千石賑之汾民健

訟邦治聽斷明決獄無稽留有民婦抱叁歲兒身被數刃指爲人殺詰之曰爾子人抱乎自抱乎曰自抱耳諭之曰母子天性豈有兒被數刃而週身無一縷血豈以兒爲扞刃具乎再詰之實兒病死用斧劃傷以陷他人者其明決多如此陞解州牧所屬之夏縣訛報民變邦治曉示安眾杖其黨魁數人閭邑帖然後解組歸優游林下以終

吳烜

吳烜固始人字鑑庵濟川仲弟也乾隆丁未進士翰林院編修充貴州廣東正副主考督江西湖北順天學政官至禮部左侍郎品端學粹外則導揚文化內則綜攝曹務所

陟歷皆清要矢勤矢慎學宗呂新吾薛文清以躬行實踐
爲主

吳其濬

吳其濬固始人字澹齋嘉慶丁丑一甲第一名進士翰林
院修撰入直南書房洊躋卿貳兵部戶部侍郎充廣東浙
江正主考督湖北江西學政秉公取士弊絕風清歷任湖
南浙江山西雲南巡撫署湖廣雲貴總督平鍾人杰曾如
炷之亂所在吏治澄清民情愛戴

成廟褒以學優守潔辦事認真可謂知之深矣歿後 賞
加太子太保銜照巡撫例賜卹賜祭葬 國史有傳

吳其泰

吳其泰固始人字希郭生有夢橘之兆故號橘生嘉慶庚辰進士由編修改御史直言盡職受

成廟知簡授浙江湖州府知府旋移首郡升江蘇蘇松太道捐廉修上海縣城垣立救生局設育嬰堂浚白茆河以漑田畝奏免商販米船關稅善政不可番數洎調江西糧道值粵匪圍城防守周密爲中丞張公芾所倚重誓與城存亡家人皆預爲死計其公而忘私如此後授江蘇按察使司讞疑獄活死罪多所平反吳江民陸孝中以抗租滋事捕獲後分別錄辦不枉一人遭母喪歸里後一年以毀

卒生平常語人曰財乏宜心到人乏宜身到至哉言乎八
祀江蘇名宦祠

曾力行

曾力行固始人乾隆庚寅解元聯捷進士任內閣中書平
羅縣知縣秦州知州平涼府同知皆有循聲

曾定球

曾定球固始人原名力甯庚寅兄弟同榜舉人歷任安徽
天長五河燕湖舒城青陽靈璧等縣知縣宿州泗州知州
咸著政績升太平府同知

曾錫恩

會錫恩固始人嘉慶庚午舉人甲戌進士丁丑翰林改工部都水司主事授吏部考功司主事簡放江南河道盡力宣防民頌其功

吳士元

吳士元固始人雍正乙卯舉人選福建武平縣知縣多惠政民爲立生祠調鳳山縣民畚雜處最稱難治生畚每潛入內地殺掠而遁官無從追捕民間有挾仇者每爲作生畚殺人狀歷任皆不能究士元蒞任有黃仲馬賜被人焚殺士元捕其仇置之法此風乃息縣南有軍功塲係造船之所生畚屢入焚殺兵民不敢輕造士元携通事單騎直

入深山傳伊頭目剴切曉諭生番皆羅拜納款獻紅毛猪
紅毛酒番蒜番梨自是軍功場永無番害倖滿歸里優游
林下而終

吳珣

吳珣士元三子穎敏有吏才乾隆戊寅以知州揀發湖南
借補瀘溪令下車卽著賢聲蒞任郡邑拾有壹桂陽來陽
尤有循績凡有疑獄並歷年未決者大吏皆檄讞之訟牘
立消壬辰持簡山西霍州牧調吉州牧民歌來暮如在楚
時告養歸籍卒於家

祝慶承

祝慶承固始人乾隆丙午四庫全書告成 欽賜舉人已酉進士翰林院編修官至雲南直隸布政使司所至皆有政績民懷其德內升太僕寺卿

祝慶蕃

祝慶蕃固始人嘉慶甲子優貢丁卯舉人辛未進士甲戌榜眼翰林院編修官至禮部尚書歷任皆恪恭將事克盡厥職

賜紫禁城騎馬柒旬慶壽蒙

成廟賜壽字並資敬延祺匾額 國史有傳

吳元炳

吳元炳字子健其浚子幼承家學作秀才時慨然以天下爲已任豫皖接陘固始爲入豫門戶髮捻疊圍城佐邑令防守厯保藍翎知縣咸豐戊午舉於鄉庚申成進士入史館奉命辦理團練蕩平金樓平輿張岡諸寨同治貳年授侍講學士出爲湖南布政使司平丹江黎平苗匪升湖北巡撫調江蘇在吳捌年三署督篆時海防方亟元炳據形勢籌餉需簡人材疏稱練兵則募新不如挑舊簡器則購買不如自製又言台灣後山沃壤千里爲洋人垂涎東西洋諸國不足爲患可慮者俄羅斯耳其健議之遠大類如此丁母憂服闋入覲派勘河工海防上八病八利疏授漕

運總督議開黃河舊道以興水利未果調安徽巡撫興利除弊一如在蘇時卒於任宦橐蕭然幾無以殮奉旨褒加賜葬祭如例

張日新

張日新字銘盤固始人乾隆初由吏員授湖北鍾祥縣丞縣北有老龍堤潰於水民被患者數十年日新蒞任屢請大府修築不許乃毀其產得二千餘金悉以修堤工成民感其德立生祠祀之

王庭蘭

王庭蘭字春綬固始人嘉慶己卯舉人壬午進士入祠館

典湖南試得人爲盛累官至廣東江南布政使所至民懷
其惠咸豐中奉 命辦理汝光防勦粵匪圍城督團郤之
旋奉 命辦安徽軍務勦撫兼施民賴以安授貴州按察
使歸卒於里第

張榮光

張榮光字瑞生固始人倜儻多奇氣家貧事母以孝聞咸
豐朶年皖匪圍固始榮光單騎縋城乞援城賴以完由軍
功薦保縣令爲曾文正公所拔識厯任廬江天長霍山宿
松所至以鋤暴安良爲務廬江歲旱哀籲大府停徵廬民
呼之爲張父至爲語曰張父再至黃天有眼其感民如此

周 錡

周錡字慕劉商城人生而岐嶷言動不妄嘉慶庚辰成進士由庶常改官縣令宦江左者十餘年其宰蕭縣也民田濱河者數千頃恒苦泛溢漂沒爲之詳審河勢淤者瀉之壅者通之使水有所歸不淹廬畝自後秋穫有收及調武進有虎而冠者邑之蠹紳也侵轍鄉曲厯任官不能制錡曰是宰之罪也爲民父母使豺狼橫行安用有司爲遂執而置諸法豪猾股栗士民以安甫數載卽賦遂初語云知足不辱知止不殆其斯之謂歟壽終七十有四

周祖植字芝生商城人嘉慶丙子舉人已卯成進士分刑部升郎中總辦秋審處有囚十八人應入緩而上官持之嚴欲爭之不得歸而思之輾轉不寐中夜忽奮然起拊床曰知人之可活而不救非夫也家人驚覺請其故不言坐以待旦質明即命輿至署手例牘與上官固爭侃侃數百言神色凜然上官不能屈囚竟得減死任江蘇按察司獎勤勞立期限清積案革弊端自輸鉅款以爲捕費數月之間案無不破犯無不獲蘇省委靡積習爲之一振每日五鼓即起治文書燭將燼而天始明或勸少休曰案早結一日被繫者早脫一日桎梏吾不忍自逸也於戲仁哉

周祖培

周祖培字芝臺尚城大京兆鉞第三子幼而凝重敏而好學嘉慶戊寅己卯聯捷成進士由庶常散館第一時長兄祖蔭已入翰林與仲兄祖植同捷禮闈大京兆適以府丞兼學政胞叔錡又以是歲登詞垣科名之盛海內榮之數年間敷歷清秩屢掌文衡道光二十四年以少司空奏對上曰汝年力正富無習氣可勵志報國以副朕望蓋其受主知登宰輔實基於此

文宗御極升體仁閣大學士時寇亂日甚首請擇朝中官爲團練大臣與督撫聯絡辦賊於是曾文正江忠烈羅忠

節李忠武趙忠節及今大學士李鴻章等皆以團練起桑梓之中平夷大難咸豐十年 車駕幸木蘭 詔留守京都十一年正月具疏請覲行在將回呈回鑾事宜 詔留京責重止勿來又屢致書與肅順爭行錢換票諸政迨

穆宗御宇奉 兩宮

皇太后至京首 召見命勘定端華肅順罪正法之曰婦孺歡呼聲聞數里祖培遂上垂簾故事請更正建元祺祥年號 累詔褒美以爲關心典禮慎重周詳晉太子太保同治六年奉 命相視萬年吉地偶感微疾遂不起遺疏上陳

皇心震悼有朕即位以來宣力彌勤之諭予謚文勤節終之典罕與比隆其贊襄密勿退不自言上書隨亦削稿鮮有知者故所聞止此

程國仁

程國仁字濟棠商城人少孤家貧力學嘉慶甲寅領鄉薦已未成進士以二甲第一名改庶吉士散館授職以御史巡漕江淮糧艘運轉迅速役竣即奉督學廣東之

命不由考試得差真異數也到任破除積習文風丕變差滿即放山東按察使時搜緝亂民林清餘黨多所株連國仁抵任別白而盡釋之擢甘肅布政使公正廉明吏泯傾

軋

睿廟嘗褒嘉之升浙江巡撫甫三月調山東巡撫時

恩詔免天下民欠而山東所奏不實因其在浙所辦實惠及民故

特詔調之會考城河決滯及曹單濮范親往履勘兼施撫卹往返河干凡八閱月以風疾乞去官得

旨俞允旋因事左遷

成皇帝御極擢廣東布政使理財用人各當市舶無擾民夷稱便任貴州巡撫生苗紅苗相讐殺或謂宜以兵勦之國仁曰緩靖邊陲但使各相安耳無事薙草羅禽也遂明

示以義不可私報並嚴緝其爲亂之渠魁罪人既得苗衆
悅服嗣以勞心血衰致疾陳請開缺

楊式穀

楊式穀字詒堂尚城人生而聰慧道光甲午領鄉薦第三
乙未會試後因用心太過得怔忡疾危甚忽夜夢入龍井
寺僧舍見一老僧跌坐曰何苦心乃爾寺後有柏子及遠
志二味可以醫醒後次日強入寺果得之調服病豁然去
辛丑提南宮入詞垣屢司文衡皆得人歷轉侍郎正色立
朝情託不行其功名每因屈而愈伸其際遇恒逢危而得
安蓋有天幸焉

王德茂

王德茂號亥坪光山人。生而穎異。九歲學爲制科文。援筆立就。篤志嗜學。植品勵行。嘉慶丙子。以優行貢成均。丁丑。考取校錄會典全書告成。議叙知縣。選授廣東石城縣。到任。裁陋規。捕盜賊。建書院。尤以正人倫。厚風俗爲急務。善決疑獄。有報媳毒姑斃者。察其媳神色哀慘。問爾姑曾欲食否。曰姑病新愈。食雞未完。越宿復進食。而卒。德茂立即親視其庾。食處傍牆隙有涎汁痕。令人掘之。得蜈蚣二。長尺許。小者無數。蓋申蜈蚣毒也。媳乃獲白。嘗五鼓赴鄉。殘月朦朧。見水田中有一人影。行甚疾。令掩捕之。皆積匪也。

役請其故曰時猶昏暗行田塍間輕捷如不著地非賊而何後調歸善縣石城民曰吾儕福薄奪我青天去矣丁憂起復選江蘇陽湖縣又調丹徒辛丑有

旨保舉人才大府舉其治行爲江南第一其畧云該員前在廣東潔已愛民實心任事械鬥頂兇之風爲之少息迨任陽湖丹徒無不結之案書役不敢售其奸盜賊不敢入其境又能躬行節儉不事逢迎尤爲難得保升同知乙巳九月赴部引

見越曰

召見奏對稱

旨諭曰汝乃有用才正好爲國出力又曰汝官檢校時朕亦在武英殿作總理也旋題補蘇州總捕同知以疾引退子四人長敷炳太學生次祖晉巳亥科舉人次敷重丁酉科舉人考取國子監學正次敷昶府經歷均克承先志孫曾多以科第顯者

張緒楷

張緒楷號朗山商城人咸豐壬子舉人庚申成進士官戶部擢御史同治三年克復金陵上疏曰願

皇上持盈保泰燭微鑒遠切究夫盛衰之故治亂之機則臣民幸甚蒙

特詔褒嘉轉鴻臚少卿順天府府丞兼學政請增建京闈
號舍二千間絕苞苴斥請託所取多知名士歷諫垣陟卿
貳凡數十奏皆能言人所不言卒年六十有五

熊傳栗

熊傳栗字民懷商城人嘉慶戊辰舉於鄉道光壬午成進
士授六合省刑緩征愛民如子署長州寶山等縣斷奇案
全名節惠政旁敷頌聲載道其宰崇明也莅任十有二年
崇孤懸海外爲夷艇通衢寧波上海俱被夷擾距崇不及
百里警報日至更兼土匪蜂起傳栗加修外城募勇防禦
崇賴以安以是升補蘇州同知又捐廉置產爲熊氏鄉會

義井族姓鄉黨賴以舉火者不下百餘家

蔣湘璐

蔣湘璐字仲寶固始人道光癸卯舉人大挑二等授鹿邑縣教諭下帷講授從學日衆成就者多學中尤詞林掄南宮登賢書者接踵而起一時文教稱極盛馬同治丙寅以鹿邑守城功加光祿寺署正銜戊辰卒於官囊橐蕭然門人賻金助葬並資送其家屬回里至今鹿邑人士猶嘖嘖稱其教澤云

任澤和

子樹森

孫爲琦

任澤和號惠堂息縣人乾隆丁酉拔貢戊申舉於鄉己酉

成進士選浙江新昌令或言新昌官貧奈何笑應曰官宜
求富乎治新昌一年民樂其政除夕有獻米一簋者曰非
敢有獻以浼官聞官元日且無以炊暫貸可乎逾日仍與
之值移海鹽令值夏旱步禱於秦駐山黎明大風揚沙有
物成陣如黑霧被風捲入海中風息大雨如注農民喜曰
不但得雨兼息蟲害矣錢唐梁同書爲錄神風驅蠖記刻
於石尋擢同知繼升嚴州府移守嘉興歸里後自號退菴
子樹森嘉慶庚辰進士分戶部甲午五月

簡放貴州糧儲道凡三權臬篆一權藩篆皆不以五日京兆稍

事遷就養安令以事掌責人踰月死家屬控省臬使擬以

草菅人命揭參樹森以案情無據不署押臬使遂委員提屍來省蒸驗訖無傷事乃已其於案件慎重皆如此以制軍保薦卽請入

覲將有退志行至楚省引疾歸遂赴長子爲琦南河同知任所咸豐四年爲琦在福建殉難聞知雖甚悼惜恒對弔者曰以身許國吾有子矣

方州志

卷之六

三

寓賢列傳

宋

任師中

任師中號德翁蜀人也卜居新息任瀘州太守與蘓軾陳慥王齊愈王齊萬潘丙古道耕詩文往來知名當世第四子首舉蔡州蘓子瞻以大魁期之請告歸田里有桐林竹陂之勝優游淮濱居息時子瞻遺時稱任夫子及卒爲文輓之曰允義大夫維蜀之珍詩文老成易之丈人去我十年其德日新庶一見之遽及元身惟慥與軾匪友則親自丙以降昔爲州民旅哭於庭惻隱酸辛禍福之來孰知其

因自壽自天自屈自信天實爲之矧凡鬼神生榮死哀自昔所難持此令名歸於九原

節舊志

陳慥

陳慥字季常號龍邱又號方山子眉州青神人風格凝峻議論慷慨尙氣節少游太學時朝廷起大儒安定胡先生瑗以範多士慥爲安定高弟子詔取賢良慥力辭願授其族之未祿者幅巾窮巷自若也戶部尙書李公常素與相友善欲以其名薦於上巧一處士號慥懇却之蘓軾傳曰方山子光黃間隱人也時慕朱家郭解爲人間里之俠皆宗之少壯折節讀書以此馳騁當世然終不遇晚乃遯於

光黃間曰歧亭野居蔬食不與世相聞時人謂之方山子
節宋史

明

馮國用

馮國用同弟勝元末由泗州寓居光州後遷定遠從高帝
積戰功國用封郢國公勝封宋國公

節舊志

張惟一

張惟一壽州人洪武初由舉人任光州學正九年入觀上
詢曰此何人左右承旨曰學正時忽有翡翠過闕上曰儒
官必曉詩詞遂命賦翡翠詩惟一卽口占曰下山翡翠烟

籠紫曉入青松日映紅喜聽上林花裏鳥一聲聲在御園
中上甚喜陞北平知府占籍於州

節舊志

陳

裕

王卿

陳裕字有容鄞縣人自幼穎悟日記萬餘言弱冠從祖通
宦游京師與姑蘇顧以山同舉茂異科景泰癸酉中順天
鄉試時有例許在京堂官舉所知晉用祭酒陳詢首以裕
薦擬官中翰會權璫惡不附已留疏不出裕卽拂衣歸鑑
湖以講學爲事時名重朝紳丁丑中乙榜除署光山司訓
九年兩應聘典文瀆蜀名士多出其門稍遷長洲教諭築
愛日堂於蘇州城東偏侍二親日不離側著有愛日堂集

捐置學田若干畝於閭門外給士之貧者秩滿轉臨江府教授日與諸生講易一時稱爲陳夫子有易學日抄傳於江右先是迎二親於光山俱年九十餘其親習其風土遂占籍於州及歿三省士子會葬於墓所厥後裕亦隱居不出後有王卿浙江西安人正德十年任光州訓導博學清修不喜奔競監司賢之亦寄籍於光

節舊志

黃竹窻

黃竹窻自晦其名止以號傳江西人曠致磊落通經史工文詞愛商城山水依山而隱著有山西集

節舊志

國朝

徐憲尹

徐憲尹字天飛大興人由明經任內邱訓導學邃品端人接之如飲醇醪晚年愛淮南山水占籍於州子翀字寧子順治己丑進士歷武昌蕪榆知縣清正愷和所至有稱辛卯同科楚闈得士最盛次子獬以選貢官知縣擢主事月有傳節舊志

錢龍

錢龍字開明湖廣人少爲諸生攻古文詞任俠負氣旣而從戎歷蘇州水師副將以病乞假遨遊山水間至商樂其風土遂僑棲焉放懷詩酒吟嘯自娛與邑人往來酬和詩

卷甚富沉雄蒼涼自成一家字亦遒勁可觀年七十餘卒
節舊志

王一臣

王一臣字德園浙之山陰人幼年隨父日章客成都卽遊
其邑庠日章故習法家言臣繼之才識通敏治讞稿老吏
以爲不如一時政府諸鉅公雅相禮重楚撫王公士俊尤
倚若左右手屢欲疏薦於朝皆堅辭尋王公督河東邀之
偕來因卜居於州以便省視後復從使相慶公於關中晚
年倦於遊因返州以終老生平重然諾好施予於人之窘
乏雖解推再三卒無倦色其佐幕時每值巨獄必悉心平

反多所矜全弟師臣字又衡亦以才猷氣節見推薦神間

節續

志

吳世則

吳世則字師堯本閩人由楚入光嫻吟咏重交誼所至多與儒士遊居室亦篤於友愛羣從籍州庠者二人

節續
志

〔方伎列傳〕

西漢

蘓 耽

固始有蘇仙市里商城有大蘇山士人相傳以爲漢蘓耽
升仙之所按耽乃桂陽郴人列仙傳載其種橘鑿井告母
後二年州大疫食橘葉當自愈鶴數十降門遂仙去未幾
果疫母如法療之得無恙後化鶴止郡城樓以爪攫板云
城郭是人民非三百甲子一來歸我是蘓仙彈我何爲云
云皆是言郴州事與固始商城無與舊志葛臣云固始蘓
仙市里與霍之九公灣接壤淮南王及八公丹竈遺蹟尙

在八公中有蘓飛各固始蘇仙疑是蘓飛此言近之

東漢

高獲

高獲字敬公新息人游學京師與光武有素師事司徒歐陽歛歛下獄當斷獲帶鐵鎖詣闕爲請帝謂曰朕欲用子宜改常姓獲對曰臣受性於父母不可改之於今出卽辭去三公爭辟不應太守鮑昱請獲禮失迎候卽告辭昱遣使追之竟不留素善天文曉遁甲能役使鬼神時郡大旱昱自往問何以致雨獲曰亟罷三郡督郵明府當自北出到三十里亭雨可致也昱從之果大雨

節後漢書

唐

僕僕先生

僕僕先生不知何許人居州西黃土山三十年嘗餌杏丹乘雲往來刺史李休光以爲妖叱左右執之有龍虎見於其側先生乘之而去

節省志

吳真人

吳真人固始上天山有石洞真人於此修道一日題頌云慕道修真性自然存心運氣養丹田心澄碧淨明如月走出輪廻入洞天已而不見

節舊志

宋

方伎列傳

褒信道人

褒信道人失其名嘗向棋師閱生道與人較奕每局祇讓
人一子卒於褒信託後事於一村叟數年後叟爲改葬但
空棺衣衾而已道人有詩云爛柯眞訣妙通神一局曾經
幾度春自出洞來無敵手得饒人處且饒人

節舊志

明

徐仁富

徐仁富元大統甲戌生於固始之善鄉村元末避亂隱居
因通醫採藥金剛台山洪武間取充太醫院醫士以神醫
名尤好積善卽中泮乃其曾孫也子時號橘隱翁能習富

業里人郎中李瀚少許可稱其天資秀異才性警敏孝友忠信克諳方脉亦可以見其爲人矣喜吟咏著樹隱遺藁孫泮梓行節舊志

高昇

高昇固始人善丹青尤工於寫眞識者稱其妙出龍眠之右景泰天順間名播江南北士大夫延致無虛日今衣冠故家先世之眞多其遺筆節汝南志

宋福

宋福固始人幼聰敏悟九章大算正統間因推算天文日影纖毫不失遂進充兵部掾史後從安遠伯征廣西授將

任佐郎致仕以耕讀教子年八十餘卒

節舊志

萬奉

萬奉光州人性至孝奉二親既終出家學道得異人金丹之旨能以氣傳人腹解人病隱銀山洞賊劫之縛奉曰傳以黃白燒煉術則解汝奉曰深山中唯有米布及錢安知黃白已而奉縛自解賊皆縛伏於是叩頭哀告始得釋去一日語童子掃門明日有高人來既而乃劉黃裳至也世宗命御史訪天下異人商城令以奉應奉力謝之臨解時有白雲滿洞雙鶴徘徊其側所著有中陽子三篇一云卽

萬鳳事具前善行傳

節舊志

黃經朴

黃經光州人善醫術洞究素問靈樞旨要切脉如神凡有所投無不立應其裔孫朴能傳其業嘗療傷寒病一劑能愈二人著有方脉諸書惜明末燬於寇節舊志

張

珍

王權高選

張珍固始人生卽雙瞽聰悟絕人七歲令人誦素問難經一遍卽默記不忘以是遂以醫鳴所至立起人疾人以神醫稱之同邑王權亦精醫道能起人危疾絕口不言利士大夫皆重之樂與之遊又高選習叔和脉訣一診卽知人生死投劑無不立愈一時賴以全活者甚眾節舊志

田道人 孫樂菴

田道人不著名字亦不知其爲何許人採藥金剛台山遂棲隱其中綠瞳修髯竟年不火食後有人於道旁遇之見離地數尺飛身而去又孫樂菴失其名採藥商城南山一日於市鬻柴薪運至邑東南崇國寺後山之巔跌坐其上吐火自焚人見於火燄閃裂中合掌端凝肺肝燎灼數里外皆異香尋有人遇於途孫曰吾已蛻身去矣言畢不見

節舊志

宋相

宋相號柏泉固始人甘貧嗜學旁及天文丹青無不曉暢

所著花雲將軍傳見稱於時孫紹湯以詩魁中州

節錄

國朝

吳續

吳續字嗣甫光州人年十餘歲受業於其師胡明襄訓以周易卽能窺其奧旨其師奇之凡天官六壬之書悉令博覽一日見諸葛武侯木牛流馬式曰此不足奇也倣爲之木盈寸許於几案間負硯而行生動如飛偶爲其季父占某日應災屆期無恙責以妄談亡何坐客起行其季父揮扇送之遂爲客騎蹉傷有妹嫁商城某爲妖所憑術家不能制續往視按八門遁甲法置旗環室內外其妖遶泣三

晝夜不能出約不爲害乃釋之凡占晴雨及休咎百不失
一爲文數千言立就年十八不應童子試師讓之續泣告
曰弟子非久於人間世者不唯不應試并不敢姻娶也閱
年餘果無疾而逝

節舊志

田 琚

田琚字藍子固始人以畫各山水得李小將軍筆意其傳
真寫照則力摹前明唐伯虎視枝山諸家一時士大夫得
其片楮皆什襲藏之

節舊志

張有臨

王文孝

張有臨字蒞南固始人少習儒書淹貫古今不樂進取因

父病無良醫究心脉理遂臻精妙遠近賴生活者甚眾又
王文孝字百順原籍徽之黟縣人幼諳方脉湯液概準丹
溪鶴臯祖婉明時隨征雲南陣卒世襲指揮孝性喜淡泊
讓世職於弟自遷居於固始善療異症人爭賴之長子應
乾世其業次子應恒列鬻序亦精其術

節舊志

鄭夢麟

鄭夢麟字穆生光州人幼習儒業屢試不售博覽方書遂
精岐黃術病應手輒愈郡人延請者踵至拯濟貧困絕不
計值州牧每式廬旌其間年七十餘卒州良醫諸生王蓋
余錦皆出其門曾孫關又從錦遊早洞秘要復紹其業屢

愈人疑難大病用藥簡要劑液多本仲景及思邈千金方
年五十餘事孀母依依孺慕所得值足以供堂上甘旨卽
已絕不肯向人多索遠近無不重之

節續志

張

祝

徐時正

張祝字九如光州人幼疎曠不事家人生產喜覽畫苑諸
書畫法出入諸家其秀逸則獨擅絕一時一時巨公爭延
致之然性僻介遇不可意人雖多方求之不得徐時正州
諸生善擘腕書山水多摹石田設色畫則悉倣大癡惜流
傳未廣故知者稀耳

節續志

王宸

王宸字拱北光州人世習日者言時有光山左氏得五雷正法宸懇授其訣每天旱祈雨結高臺於竹城中上豎大旗宸在臺上披髮仗劍晝夜作法先期示某日時有雨至日官僚畢至行禮宸用劍挑動遠岫朶雲隨卽彌巨晴空風雨驟至雷霆旋繞旗上宸破碗書符禦之霎時平地水深尺餘其術屢試於光汝信羅間上官並優禮之免其差徭平居持戒端嚴未嘗輕洩其法時偶需雨值虹出宸拈茅葉斬之虹遂中斷卒年七十餘其子繼習其術試之亦有效但遣雷呼雨靈異不及乃父子死後遂無能繼之者

節續志

梅雲

梅雲固始人精奇經入脉里人皆稱爲神醫嘗治夏姓一孕婦十二月未生脰謂脉無神氣懷如抱甕此鬼胎也不下之三年不生遂以藥下一肉團提起似人形又葉生無子婦人懷孕請脰喜信答謂右尺脉雙至必是雙男第瀆而無力恐不能育耳後果生二子數日皆死馮氏婦因哭子一慟而死將斂雲過其家視之曰是氣閉非死也取銀針刺臏中穴將氣門重按卽活其應驗多如此者子楫邑諸生乾隆三年邑內荒捐稻穀五十餘石賑飢同社舉爲

優生

節續

唐錫純

唐錫純光州人幼業儒以家貧改而學醫潛志方書治療
多驗尤精於瘍科嘗決其某日潰膿某日生肌結痂至期
毫髮不爽性好濟人每貧者不能就醫不憚徒步往視嘗
謂坡公云病人得藥吾爲之體輕某覺此語真是刻刻在
我心窩裏簡事畧

附釋流

前五代北齊

慧思

淨居山在光山縣南四十里大蘇山之南小蘇山之北齊

天保中僧慧思過此見父老問其姓曰蘇氏又得二山名
乃嘆曰吾師告我遇三蘇則住遂留結菴而父老竟無有
蓋山神也其後僧智顛見慧思於北山而得法焉則世所
謂思大和尚智者大師是也唐神龍中道岸禪師始建寺
於其地

節東坡
詩序

陳

智顛

智顛天台山禪師陳天嘉初謁慧思師一見謂曰昔靈鷲
同聽法華經今復來矣相與處二十九年化

節舊
志

宋

寶磨

蘇東坡過嘉祿嶺南二十五里休馬逆旅見壁間詩云滿院秋光濃欲滴老僧倚杖青松側只怪高聲門不應喚予踏破蒼苔色末題云寶磨書宗祥曰此光黃間狂僧也

節東

坡詩話

石蓮澄

石蓮澄杞縣人住錫光州七峯寺持身孤梗從耳根圓通悟入精楞嚴諸經與商城僧閻賴機契嘗示龍樹居士偈云一字也無猶外分便恁麼時落二機等間拈得些些子拋出古今滿地疑後至毫寺僧多病出鉢囊濟之尋愈一

夕召寺眾至曰予來日當辭去諸大德各宜努力翌午端坐逝著有夢語集中庸宗義侍止者機藏之節舊志

僧深有

無念禪師名深有十餘歲祝髮遍叅諸方久之豁然大悟始卓錫於麻城之龍潭湖後棲商城西南黃蘗山剪棘種畦與眾僧叅禪念佛遂成道場著黃蘗復問圓寂後人傳

燈錄

節舊志

海育

海育俗姓黃字曠烈商城人幼能詩文尤精書法爲博士弟子高等及明末寇亂棄家披剃遨遊名山叅禪訪道老

而歸里棲虎塘寺終焉

節舊志

國朝

貫珥

靈岳名貫珥本姓徐長鬚偉幹猿臂善射遼陽將家子也
明末祝髮天童山寺悟無生法得臨濟禪宗行脚叅訪自
江浙歷淮揚至湘漢者二十年老而倦於遊遂棲商城縣
南之永明寺鋤山種芋自食其力頗工詩尤好讀書凡經
史子集皆涉獵之與邑人黃卷楊蘅爲方外友每過訪行
歌贈答輒永夜不輟年七十二示寂其徒德融亦能詩善

楷書

節舊志